



Äntwert vun der Finanzministesch Yuriko Backes a vum Minister fir d'Fonction publique Marc Hansen op d'parlamentaresch Ufro n°5904 vum 09. Mäerz 2022 vun dem honorabelen Deputéierte Marc Goergen iwwer de recouvrement forcé

All Contribuabel gëtt vun der Steierverwaltung informéiert wat hien ze bezuelen huet a wéini hien de Betrag deen en schëlleg ass ze bezuelen huet.

De geneeën Oflaf vun der Prozedur vum *recouvrement forcé* ass den 1. Februar 2021 an der Finanz- a Budgetskommissioun ausféierlech beschriwwen ginn. Och goufen deemools déi verschidde Moyens'en déi dem Steierzueler am Härtefall zur Verfügung sti beschwat.

Am Fall vun den Avancé gëtt am Ufank vum Joer e Relevé un de Contribuabel geschéckt mat den Avancen déi fixéiert goufen an den Datumer un deenen d'Avancen ze bezuele sinn.

Am Fall vun der Lounsteier berechent den Employeur selwer wat ze bezuelen ass, hält de Montant vun der Paie zeréck a mécht d'Deklaratioun an de Versement vun der Lounsteier un d'Steierverwaltung.

Am Fall vun der Besteuerung gëtt een Dekont un de Contribuabel geschéckt mam Betrag deen ze bezuelen ass a mam Datum vun der Echeance.

De Contribuabel huet d'Méiglechkeet :

- mat enger motivéierter Demande de Steierbüro ze froen datt d'Avancen erofgesat ginn,
- no enger Besteuerung, a virun der Echeance vun dëser Besteuerung, een Delai de Paiement ouni Zënsen (4 Méint) oder mat reduzéierten Zënsen (5 Méint bis 12 Méint: 0,1% oder 13 Méint bis 3 Joer : 0,2%) beim Steierbüro unzefroen.

Et handelt sech a béide Fäll ëm eng Ermessens-Entscheidung nom §2 Steueranpassungsgesetz. E Recours hiérarchique géint esou eng Decisioun ass méiglech.

De Contribuabel ass zu all Moment iwwer seng Situatioun informéiert. No der Echeance kritt de Contribuabel all 3 Méint en Extrait de Compte geschéckt.

De Contribuabel huet also eng sëllege Geleeënheeten sech ze regulariséieren éier de *recouvrement forcé* ufänkt.

Wann de Contribuabel seng Scholden net bezilt, huet de Receveur vum Gesetz hir d'Obligatioun mat allen Moyens'en déi him zur Verfügung stinn d'Suen, déi dem Staat geschélt an *échus* sinn, anzedreiwen.

D'Poursuite fänke mat enger Contrainte un, déi dem Contribuabel zesumme mat engem Commandement zougestallt gëtt.

Wann de Contribuabel no der Zoustellung vun der Contrainte an dem Commandement net bezilt, gräift de Receveur op déi verschidde Moyens'en zeréck, déi him zur Verfügung stinn fir d'Suen anzedreiwen.

D'Berodung vun engem Contribuabel de Problemer mat Scholden huet gehéiert net zu den Aufgabe vun der Steierverwaltung. Et ginn Servicer déi an dës Berodunge spezialiséiert sinn.



D'Steierverwaltung féiert keng Statistike betreffend d'Unzuel vu Recouvrements-Dossier'en wou de Steierzueler verscheet ass. En Zesammenhang tëschent *recouvrement forcé* a Suicide ass net bekannt.

Intern bitt d'Steierverwaltung keng spezifesch Formatiounen un. D'Personal vun der Steierverwaltung, esou wéi all Agent oder Equippen, hunn awer Accès op all Coursen am INAP. De *service psychosocial* vun der Fonction publique bitt an dem Kader sëllege Coursen un, déi ganz ënnerschiddlech Methode vermëttelen, wéi een individuell mat belaaschtende Situatiounen ëmgeet. Doriwwer eraus bitt den *service psychosocial* och op Mooss geschneidert Interventiounen fir Administratiounen un, an deenen déi Agenten d'office, duerch déi Natur vun der Aarbecht méi héijen psychosoziale Risiken ausgesat sinn. Dat sinn zum Beispill Supervisiounen, wou déi betreffend Agenten an der Équipe iwwert hier professionellt Verhalen an esou schwierege Situatiounen reflektéieren a Pisten ausschaffen, fir och op laang Dauer, trotz esou enger Belaaschtung, gesond ze bleiwen.

De *service psychosocial* vun der Fonction publique ass eng Ulafstell fir all Agent aus der Fonction publique, also och fir déi Agenten aus der Steierverwaltung. Qualifizéiert Psychologen an Psychotherapeuten offréieren hei individuell a vertraulech psychologesch Berodungen – fir Agenten, déi sech an enger akuter Belaaschtungssituatioun befannen, mee och fir déi, déi méi präventiv wëlle schaffen. Dës Berodung ass e Service vum Employeur Staat a gratis fir all d'Agenten.

Lëtzebuerg, den 8. Abrëll 2022

D'Finanzministesch

(s.) Yuriko Backes